

愛欲品第三十二 三十有三章

愛欲品者。賤姪恩愛世人為此盛生災害。

心放在姪行 欲愛增枝條

分布生熾盛 超躍貪果猴

以為愛忍苦 貪欲著世間

憂患日夜長 莛如蔓草生

人為恩愛惑 不能捨情欲

如是憂愛多 潺潺盈于池

夫所以憂悲 世間苦非一

但為緣愛有 離愛則無憂

己意安棄憂 無愛何有世

不憂不染求 不愛焉得安

有憂以死時 為致親屬多

涉憂之長塗 愛苦常墮危

為道行者 不與欲會 先誅愛本

無所植根 勿如刈葦 令心復生

如樹根深固 雖截猶復生 輒當還受苦

愛意不盡除 得脫復趣樹

猿猴得離樹 出獄復入獄

眾人亦如是 習與憍慢并

貪意為常流 自覆無所見

思想猗姪欲 愛結如葛藤

一切意流行 能斷意根原

唯慧分別見 思想為滋蔓

夫從愛潤澤 老死是用增

愛欲深無底 但用食貪欲

所生枝不絕 愚人常汲汲

養怨益丘塚 慧人不謂牢

雖獄有鈎鑊 染著愛甚牢

愚見妻子息 深固難得出

慧說愛為獄

是故當斷棄	不視欲能安
見色心迷惑	不惟觀無常
愚以為美善	安知其非真
以婬樂自裹	譬如蠶作繭
智者能斷棄	不盼除眾苦
心念放逸者	見婬以為淨
恩愛意盛增	從是造獄牢
覺意滅婬者	常念欲不淨
從是出邪獄	能斷老死患
以欲網自蔽	以愛蓋自覆
自恣縛於獄	如魚入筍口
為老死所伺	若犢求母乳
離欲滅愛迹	出網無所弊
盡道除獄縛	一切此彼解
已得度邊行	是為大智士
勿親遠法人	亦勿為愛染

不斷三世者	會復墮邊行
若覺一切法	能不著諸法
一切愛意解	是為通聖意
眾施經施勝	眾味道味勝
眾樂法樂勝	愛盡勝眾苦
愚以貪自縛	不求度彼岸
貪為敗處故	害人亦自害
愛欲意為田	婬怨癡為種
故施度世者	得福無有量
伴少而貨多	商人怵惕懼
嗜欲賊害命	故慧不貪欲
心可則為欲	何必獨五欲
違可絕五欲	是乃為勇士
無欲無有畏	恬淡無憂患
欲除使結解	是為長出淵
欲我知汝本	意以思想生

我不思想汝 則汝而不有

伐樹忽休 樹生諸惡 斷樹盡株

比丘滅度 夫不伐樹 少多餘親

心繫於此 如犢求母